

ՀՀ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵԻ
ԻՐԱՎԱԲԱՆԱԿԱՆ ՎԱՐՉՈՒԹՅՈՒՆ

Ո Ր Ո Շ ՈՒ Մ թիվ - 4

ՎԱՐՉԱԿԱՆ ՏՈՒՅԺ ՆՇԱՆԱԿԵԼՈՒ ՄԱՍԻՆ

«11» հունվարի 2024թ.

ք. Երևան

Ես՝ ՀՀ պետական եկամուտների կոմիտեի իրավաբանական վարչության ղեկավար Արման Մնացականյանս, քննելով՝ Նարեկ Արմենի Պողոսյանի (անձնագրի համար՝ AL0520553, հասցե՝ ՀՀ, Արարատի մարզ, գյուղ Այնթափ, 13-րդ փողոց, 10-րդ նրբանցք, տուն 7) նկատմամբ հարուցված մաքսային կանոնների խախտման վերաբերյալ գործը,

Պ Ա Ր Չ Ե Ց Ի՝

2023 թվականի նոյեմբերի 11-ին Բազրատաշենի մաքսային կետ-բաժին է ժամանել քաղաքացի Նարեկ Արմենի Պողոսյանի կողմից վարվող «VOLVO» մակնիշի, «033VY80/02A666» պետհամարանիշի բեռնատար տրանսպորտային միջոցը, որով վերջինս Վրաստանից «Ախսագո» ՍՊ ընկերության անվամբ բեռ է տեղափոխել: Մաքսային հսկողության գոտում մաքսային աշխատակցի բանավոր հարցին արդյոք վերջինս ունի հայտարարագրման ենթակա ապրանքներ, քաղաքացին պատասխանել է, որ չունի: Մաքսային հսկողություն իրականացնելու նպատակով բեռնատար տրանսպորտային միջոցն ուղարկվել է «RAPISKAN» ռենտգեն տեսազննության, ինչի արդյունքում վարորդի համար նախատեսված խցիկում մաքսային աշխատակիցը նկատել է ապրանքներ և բեռնատարը ուղարկվել է խորը զննման անգար: Տեսազննման և զննման արդյունքում վարորդի համար նախատեսված խցիկի տարբեր հատվածներից հայտնաբերվել են պոլիէթիլենային տոպրակների մեջ փաթեթավորված տարբեր տեսակի նշանագրության դեղորայք:

Փաստի առթիվ վարորդ՝ Նարեկ Արմենի Պողոսյանի նկատմամբ «Մաքսային կարգավորման մասին» ՀՀ օրենքի 313-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն:

Նարեկ Արմենի Պողոսյանը ՀՀ ՊԵԿ Բազրատաշենի մաքսային կետ-բաժնում բացատրություն է տվել այն մասին, որ վարում է «VOLVO» մակնիշի, «033VY80/02A666» պետհամարանիշի բեռնատարը, որը 08.11.2023 թվականի բեռնվել է Թբիլիսի քաղաքում և պետք է տեղափոխեր Երևան: Հաջորդ օրը ճանապարհին կայանած ժամանակ իրեն է մոտեցել մի տղամարդ Գեորգի անունով և առաջարկել բեռ տեղափոխել Երևան: Բեռը դեղորայք էր և Երևան հասցնելու համար առաջարկել է վճարել 100 ԱՄՆ դոլար: Ոհնենալով ֆինանսական խնդիրներ համաձայնվել է տեղափոխել դեղորայքը Երևան: Հատելով Բազրատաշեն անցակետը մաքսային ծառայողը իրեն հարցրել է արդյոք ունի հայտարարագրման ենթակա ապրանքներ, պատասխանել է, որ չունի, ինչից հետո բեռնատարն ուղարկել են ռենտգեն զննության, ինչի արդյունքում մաքսային ծառայության աշխատակիցը նկատել է տարօրինակ իրեր բեռնատարի խցիկում և հարցրել է, իսկ նա պատասխանել է, որ քրի 22երն են այդպես երևում: Միասին մոտեցել են բեռնատարին

բարձրացել խցիկ և նա բարձրացրել է նստարանը, որի տակ դրված են եղել իր կողմից վերցված դեղորայքը:

Վարչական վարույթում առկա տեսանյութի ուսումնասիրությունից պարզվել է, որ ապրանքները տեղադրված են եղել բեռնատար տրանսպորտային միջոցի վարորդի համար նախատեսված խցիկի տարբեր հատվածներում՝ փաթեթավորված պոլիէթիլենային տոպրակներում, ինչն ակնհայտ դժվարացրել է ապրանքների հայտնաբերումը:

Վարչական վարույթի ընթացքում 21.11.2023 թվականին հարցում է կատարվել ՀՀ ՊԵԿ մաքսային հսկողության վարչություն՝ ճշտելու մասնացուցակում նշված դեղորայքի մաքսային արժեքը, որին ի պատասխան հայտնվել է, որ 11.11.2023 թվականի դրությամբ 14 դեղերի («Фраксипарин» 10 однор. шприцев по 0.3 мг 400 հատի մաքսային արժեքը կազմում է 119660 ՀՀ դրամ, «Сиофор» метформин 1000 мг 480 հատի մաքսային արժեքը կազմում է 8782 ՀՀ դրամ, «Зовиракс» крем 5 мг 288 տուփի մաքսային արժեքը կազմում է 801733 ՀՀ դրամ, «Зиртек» капли 20 мл 1000 տուփի մաքսային արժեքը կազմում է 14600 ՀՀ դրամ, «Зиртек» таблетки 10 мл 500 տուփի մաքսային արժեքը կազմում է 884627 ՀՀ դրամ, «Беродуал» 0.25 мг+0.5мл/мл 900 տուփի մաքսային արժեքը կազմում է 27817 ՀՀ դրամ, «Аква Детрим» витамин Д3 вод. раствор 6800 հատի մաքսային արժեքը կազմում է 19.000 ՀՀ դրամ, «АЦЦ» лонг 600 мг 20 табл. шипучка 500 հատի մաքսային արժեքը կազմում է 44054 ՀՀ դրամ, «Верошпирон» таблетки 25 мг 10000 հատի մաքսային արժեքը կազմում է 36252 ՀՀ դրամ, «Верошпирон» капсула 50 мг 1000 հատի մաքսային արժեքը կազմում է 81593 ՀՀ դրամ, «Кетонал» ДУО 150мг капсула 3000 հատի մաքսային արժեքը կազմում է 456965 ՀՀ դրամ, «Альфа Нормикс» риксфаксимин 200 мг таблетки 684 տուփի մաքսային արժեքը կազմում է 278778 ՀՀ դրամ, «Кордарон» амиобарон 200 мг 160 փաթեթի մաքսային արժեքը կազմում է 71154 ՀՀ դրամ, «Апилак» таблетки 10 мг 100 հատի մաքսային արժեքը կազմում է 146673 ՀՀ դրամ) մաքսային արժեքը ընդհանուր կազմում է՝ 2991688 ՀՀ դրամ: Միաժամանակ հայտնվել է, որ մասնացուցակի 1-ին, 3-րդ, 5-րդ, 12-րդ, 13-րդ, 14-րդ, 18-րդ, 21-րդ, 22-րդ, 24-րդ տողերի դեղերի մասով տեղեկություն առկա չի եղել:

ԵԱՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս, որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

«Մաքսային կարգավորման մասին» ՀՀ օրենքի 301-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Մաքսային կարգավորման մասին» ՀՀ օրենքի 313-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի հիսուն տոկոսի չափով, բայց ոչ պակաս քան մեկ միլիոն դրամի չափով:

«Մաքսային կարգավորման մասին» ՀՀ օրենքի 332-րդ հոդվածի 1-ին մասի համաձայն՝ մաքսային կանոնների խախտումների վերաբերյալ գործը քննվում է վարչական պատասխանատվության ենթարկվող անձի մասնակցությամբ կամ Վարչական իրավախախտումների վերաբերյալ ՀՀ օրենսգրքի 267-րդ հոդվածով սահմանված դեպքերում՝ տվյալ անձի բացակայությամբ, իսկ նույն հոդվածի 2-րդ մասի համաձայն՝ մաքսային կանոնների խախտումների վերաբերյալ գործը կարող է քննվել սույն հոդվածի 1-ին մասում նշված անձի բացակայության դեպքում, եթե անձը բացակայում է և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Նարեկ Արմենի Պողոսյանը 2024 հունվարի 11-ին հրավիրվել է ՀՀ ՊԵԿ Իրավաբանական վարչություն՝ իր նկատմամբ «Մաքսային կարգավորման մասին» ՀՀ օրենքի 313-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն «Մաքսային կարգավորման մասին» ՀՀ օրենքի 332-րդ հոդվածի՝ չներկայանալու դեպքում վարչական գործի քննությունը կիրականացվի իր բացակայությամբ, սակայն վերջինս չի ներկայացել:

Ուսումնասիրելով Նարեկ Արմենի Պողոսյանի սահմանահատումների վերաբերյալ սահմանային էլեկտրոնային կառավարման տեղեկատվական համակարգի տվյալները՝ պարզվել է, որ վերջինիս 04.01.2024 թվականին մեկնել է Հայաստանի Հանրապետությունից և մինչ օրս չի վերադարձել:

Այսպիսով, նյութերով պարզվել է, որ 2023 թվականի նոյեմբերի 11-ին Նարեկ Արմենի Պողոսյանը մաքսային հսկողությունից թաքցնելով, այն է՝ իր կողմից շահագործվող «VOLVO» մակնիշի, «033VY80/02A666» պետհամարանիշի բեռնատար տրանսպորտային միջոցի վարորդի համար նախատեսված խցիկի տարբեր հատվածներում թաքցնելով, ՀՀ մաքսային սահմանով տեղափոխել է ընդհանուր 2991688 ՀՀ դրամ մաքսային արժեքով դեղորայք, այսինքն՝ վերջինս թույլ է տվել «Մաքսային կարգավորման մասին» ՀՀ օրենքի 313-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, Բագրատաշենի մաքսային կետում արված տեսանյութով, Արևելյան մաքսատուն-վարչության գրությամբ և Նարեկ Արմենի Պողոսյանի բացատրությամբ:

Հիմք ընդունելով «Մաքսային կարգավորման մասին» ՀՀ օրենքի 313-րդ, 334-րդ հոդվածները.

Ո Ր Ո Շ Ե Ց Ի՝

1. Նարեկ Արմենի Պողոսյանին ճանաչել զանցառու «Մաքսային կարգավորման մասին» ՀՀ օրենքի 313-րդ հոդվածով և նրան տուգանել ապրանքների մաքսային արժեքի հիսուն տոկոսի չափով՝ 1495844 ՀՀ դրամի չափով:

2. Որոշման մասին հայտնել Ն. Պողոսյանին՝ պարզաբանելով, որ «Մաքսային կարգավորման մասին» ՀՀ օրենքի 334-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: «Մաքսային կարգավորման մասին» ՀՀ օրենքի 334-րդ հոդվածի 4-րդ մասի

համաձայն՝ որոշումը կարող է բողոքարկվել «Մաքսային ծառայության մասին» օրենքի 37-րդ հոդվածով սահմանված կարգով կամ դատական կարգով՝ երկու ամսվա ընթացքում:

ՀՀ պետական եկամուտների կոմիտեի իրավաբանական վարչություն

(ստորաբաժանման անվանումը)

ղեկավար՝

Արման Մնացականյան

(անուն, ազգանուն)


(ստորագրություն)

Որոշման օրինակը՝ 4 էջերի վրա ստացա.

(իրավախախտում կատարած անձի անունը, ազգանունը, հայրանունը կամ տվյալ անձի
ներկայացուցչի անունը, ազգանունը, հայրանունը և լիազորությունը հաստատող
փաստաթղթի տվյալները)

(ստորագրություն)

«__» _____
(որոշման օրինակի ստացման ամսաթիվը)

20__ թ.

Ծանոթություն. Սույն որոշմամբ նշանակված փույժի գումարը ենթակա է վճարման Կենտրոնական գանձապետարանի №900005024055 հաշվեհամարին 19 ծածկագրով:

Սույն որոշումն անբողոքարկելի դառնալուց հետո «Վարչարարության հիմունքների և վարչական վարույթի մասին» օրենքի 88-րդ հոդվածով սահմանված կարգով և ժամկետներում ուղարկվում է Հայաստանի Հանրապետության հարկադիր կատարումն ապահովող ծառայություն:

Եթե առկա են վերցված ապրանքներ, դրանք վերադարձվում են «Մաքսային կարգավորման մասին» ՀՀ օրենքի 335-րդ հոդվածով սահմանված կարգով և ժամկետներում: